

Meeqqanut tapiissutit pillugit Namminersornerullutik Oqartussat nalunaarutaat

Meeqqanut tapiissutit pillugit Inatsisartut peqqussutaanni nr. 11,31. oktober 1996-imeersumi § 4, Imm. 3 aamma § 6, Imm. 5 malillugit aalajangersarneqarput:

Kapitali 1.

*Isertitarineqartussatut naatsorsuutigisat tunngavigalugit meeqqanut tapiissutit tunniunneqartarnerannut
piumasaqaatit*

§ 1. Isertitat meeqqanut tapiissutit tunniunneqarneranni tunngavigineqartut annertuumik piujuartumillu ikilinnissaat naatsorsuutigineqassaaq makkuninnga pisoqartillugu;

1) toqukkut qimaguttoqarnerani, averusernermi, avinnermi, uppersarsagaasumilluunniit katissimanngitsut aappariikkunnaarneranni tamakkiisumik ilaannakortumilluunniit isertitat tunniussinnermut tunngaviusimasut naatsorsuutigineqarunnaassapput,

2) inuk, isertitai meeqqanut tapiissutit tunniunneqarneranni tunngavigineqarsimasut, pisortanit pensionisiaqalerpat, imaluunniit taassuma nappaammik, innarluuteqarnermik assigisaannilluunniit pissuteqarluni sulisinnaajunnaarnini uppersarsarpagu, imaluunniit

3) inuk, isertitai meeqqanut tapiissutit tunniunneqarneranni tunngavigineqarsimasut, tapiiffigineqarsinnaasumik ilinniagaqalerpat ilinniagaqaqqippalluunniit qaammatinit arfinilinnit sivilunerusumik.

Imm. 2. Suliffissaaleqineq napparsimallatsiarnerluunniit pissutigalugit isertitat appariarnerat isertitat ataavartumik annertuumillu appariarnerattut isigineqanngillat.

§ 2. Ukiumut tapiiffmsussamut isertitassatut naatsorsuutigisat naatsorsorneqarneranni, ukiulluunniit tapiiffmsussap sinneranut isertitassatut naatsorsuutigisat naatsorsorneranni inuup inuilluunniit meeqqanut tapiissutit tunniunneqarneranni isertitaat tunngavigineqartussat tamakkivillugit naatsorsuutigineqassapput, ukiumi tapiiffmsussami inuup akileraartarnermut ilanngaatai ilanngaatigalugit.

Imm. 2. Isertitat ilaasa peersimanerannut uppersarsaammik isumaginninnermut ataatsimiititaliaq piumasaqarsinnaavoq, soorluttaaq piffissaq taanna isertitat annertussusiannut uppersarsaammik piumasaqartoqarsinnaasoq, kiisalu akileraartarnermi ilanngaatip annertussusianut.

§ 3. Isertitassatut A-tut naatsorsuutigisat naatsorsorneranni piffissaq taanna isertitat A-t tamarmik naatsorsuutigineqassapput, ukiumut isertitanngorlugit naatsorsukkat.

Imm. 2. Ukiumi tapiiffmsussami isertitassatut B-tut naatsorsuutigisat naatsorsorneqarneranni isertitanik naatsorsuiffiusumi ukiumi kingullernii B-itut isertitat tunngavigineqassapput, taamaassanngilarli inuup B-inik isertitaqarsimasup uppersarsarsinnaappagu nammineerluni isertitarigini tassaasullu § 1 -imi

taaneqartut pissutigalugit atuukkunnaarsimasut annertuumilluuniit ikileriarsimasut. Taama pisoqartillugu inuup B-itut isertitassatut naatsorsuutigisai naatsorsorneqassapput piffissaq taanna B-itut isertitarisimasaanit ukiumut isertitanngorlugit naatsorsukkanit.

Kapitali 2.

Meeqqanut tapiissutit tunnhmneqariarnerat il.il.

§ 4. Meeqqanut tapiissutit qanoq tunniuneqartarmssaat isumaginnimiermut ataatsimiititaliap aalajangertassavaa, piumasarisimiaallugulu tapiissutininik tiguisisussap aningaaserivimmi assigisaaniluunniit tapiissutit ilineqarfigisinnaasaannik kontomik nalunaaruteqartoqarnissaa.

§ 5. Kommumini tunniussiviusussami isumaginninnermut ataatsimiititaliaq aalajangersinnaavoq meeqqanut tapiissutit ilaat meeqqanut 15-it sinnerlugit ukioqartunut skolehjemmini assigisisaaniluunniit najugaqartunut toqqaannartumik tunniutissallugit. Taamaallaat meeqqap atisassarsiniutissaanut kaasarfimmiusaanullu meeqqamut aningaasanngorlugit toqqaannartumik tunniussisoqarsinnaavoq.

§ 6. Isumaginninnermut Ataatsimiititaliaq isumaqarpat, inuup tapiissutininik tiguisinnaatitaasup tapiissutit meeqqamut iluaqutaasussamik aqussinnaanngikkai, ataatsimiititaliaq meeqqanut tapiissutit pisortanit aqunneqarnissaannik imaluunniit tapiissutit ilaasa nioqqutissanngorlugit tunniunneqarnissaannik aalajangersinnaavoq. Meeqqap pilersornerani aningaasartuutit suut tapiissutinit matussuserneqassanersut pillugit takussutissiortoqassaaq. Tunniussinerit nioqqutissanik pisissutissanngornissaat (rekvisition) piumaneqarneruvoq. Aningaasat amerlanngitsut, immaqaa naafferartumik, tapiissutininik tiguisinnaatitaasumut aningaa-sanngorlugittunniunneqartarsinnaapput.

Imm. 2. Meeqqanut tapiissutit ilaasa meeqqamut tunniunneqarnissaannik isumaginninnermut ataatsimiititaliaq aalajangerpat meeqqap pilersornissaanut aningaasartuutit suut tapiissutininik matussuserneqassanersut pillugit takussutissiortoqassaaq, aamma aningaasat qanoq amerlatiginissaannik.

Imm. 3. Meeqqanut tapiissutit ilaasa meeqqamut tunniunneqarnissaannik isumaginninnermut ataatsimiititaliaq aalajangerpat ilanngullugu ataatsimiititaliaq aalajangersinnaavoq meeqqanut tapiissutinit sinneruttut pisortanit aqunneqassasut.

Imm. 4. Imm. 1-2-imi aningaasartuutissanut takussutissat taaneqartut sapinngisaq tamakkerlugu meeqqanut tapiissutisisinnaatitaasoq suleqatigalugu suliarineqassapput.

Kapitali 3.

Atortuulersitsineq.

§ 7. Nalunaarut manna 1. januar 1997 atortuulersinneqarpoq.

Imm. 2. Peqatigitillugu Meeqqanut tapiissutit pillugit Namminersornerullutik Oqartussat nalunaarutaat nr. 6, 17. februar 1987-imeersoq atorunnaarsinneqarpoq.

Namminersornerullutik Oqartussat, ulloq 19. december 1996

Daniel Skifte

/

Benedikte Thorsteinsson

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut